

MALAYSIA

DEWAN RAKYAT

ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI RABU, 28 OKTOBER 2015, PUKUL 10.00 PAGI

Bil. 44

PERTANYAAN-PERTANYAAN BAGI JAWAB LISAN

1. PR-1333-L71355
Datuk Liang Teck Meng [Simpang Renggam] minta **MENTERI PERTANIAN DAN INDUSTRI ASAS TANI** menyatakan perkembangan usaha yang dilaksanakan oleh Kementerian dalam menggalakkan lebih banyak pembangunan pusat ternakan lembu bagi meningkatkan industri pengeluaran bekalan daging lembu serta mengurangkan kebergantungan kepada daging dan lembu import.
2. PR-1333-L70259
Tuan M. Kulasegaran [Ipoh Barat] minta **MENTERI PELANCONGAN DAN KEBUDAYAAN** menyatakan :-
 - (a) perkembangan terkini atau status yang terbaru terhadap pengisytiharan Vivekananda Ashram di Brickfields sebagai bangunan warisan; dan
 - (b) bangunan-bangunan lama di negeri-negeri lain yang turut dipertimbangkan oleh Kerajaan sebagai Bangunan Warisan.
3. PR-1333-L70779
Datuk Aaron Ago anak Dagang [Kanowit] minta **MENTERI KOMUNIKASI DAN MULTIMEDIA** menyatakan dasar dan langkah-langkah yang diambil oleh Kementerian bagi memantau dan menangani masalah media sosial yang sangat melampau terhadap Kerajaan dan individu atau ahli politik di negara ini.
4. PR-1333-L70057
Raja Dato' Kamarul Bahrin Shah [Kuala Terengganu] minta **PERDANA MENTERI** menyatakan apakah langkah-langkah tambahan persediaan bagi menghadapi banjir akhir tahun 2015 ini memandangkan banyak situasi tahun 2013 dan 2014 lepas terutamanya di pantai timur menunjukkan banyak kelemahan menghadapi situasi banjir dan juga kerja-kerja pemulihan selepas banjir.

5. PR-1333-L71011
Dato' Ir. Haji Nawawi bin Ahmad [Langkawi] minta **MENTERI PERTANIAN DAN INDUSTRI ASAS TANI** menyatakan terdapat lebih 1500 orang nelayan yang berdaftar dan berlesen di Pulau Langkawi . Tetapi masih terdapat lebih dari 2000 orang nelayan yang belum berdaftar sebagai nelayan tetapi mereka merupakan nelayan tulen di mana pekerjaan mereka hanyalah sebagai nelayan. Apakah perancangan Kerajaan bagi membantu agar semua nelayan tulen didaftarkan sebagai nelayan berlesen dan layak menerima elaun bulanan sara hidup nelayan.
6. PR-1333-L69905
Dr. Azman bin Ismail [Kuala Kedah] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan tentang pelan pembangunan semula bandar Kuala Kedah. Bagaimanakah perkembangan rancangan pembangunan pekan Kuala Kedah tersebut.
7. PR-1333-L70038
Datuk Wilson Ugak Kumbong [Hulu Rajang] minta **MENTERI DALAM NEGERI** menyatakan sekiranya pihak Kementerian ada cadangan untuk membina pos kawalan di Long Busang, Belaga, di Long Singgut dan di Bukit Mabong, Tunoh, Sungai Mujong di Kapit, Sarawak.
8. PR-1333-L69584
Dr. Michael Jeyakumar Devaraj [Sungai Siput] minta **MENTERI SUMBER MANUSIA** menyatakan bilangan kematian setiap tahun di industri pembinaan sejak 2006 dengan pecahan nasionaliti mangsa. Apakah ganti rugi yang dibayar sebagai hilang upaya sementara dan juga hilang upaya kekal kepada pekerja migran yang dcedera dalam kemalangan semasa bekerja.
9. PR-1333-L71272
Datuk Wee Jeck Seng [Tanjong Piai] minta **MENTERI KESIHATAN** menyatakan adakah Kementerian berhasrat untuk memperluaskan zon larangan merokok di seluruh negara. Apakah usaha Kementerian bagi memastikan perlaksanaan ini tercapai dan pada masa yang sama tidak mengundang implikasi negatif terhadap masyarakat.
10. PR-1333-L70884
Dr. Lee Boon Chye [Gopeng] minta **PERDANA MENTERI** menyatakan usaha Kerajaan untuk membantu pemandu teksi dan pengusaha teksi yang menghadapi saingan daripada perkhidmatan "Uber".
11. PR-1333-L71566
Dr. Mansor bin Abd Rahman [Sik] minta **MENTERI PENDIDIKAN TINGGI** menyatakan apakah ada sebarang pemantauan terhadap pusat pengajian tinggi swasta berkaitan harga barangan atau caj-caj perkhidmatan yang dikenakan kepada pelajar-pelajar melalui potongan PTPTN.
12. PR-1333-L70400
Tan Sri Dato' Seri Abd Khalid bin Ibrahim [Bandar Tun Razak] minta **MENTERI WILAYAH PERSEKUTUAN** menyatakan status terkini rancangan Kampung Baru Kuala Lumpur.

13. PR-1333-L69665
Datuk Juslie bin Ajirol [Libaran] minta **PERDANA MENTERI** menyatakan langkah strategik Malaysia dalam menyusun semula pendekatan ekonomi yang lebih berhemah dan menyesuaikan diri dengan ekonomi global yang perlahan.
14. PR-1333-L70305
Dr. Tan Seng Giaw [Kepong] minta **PERDANA MENTERI** menyatakan keadaan sebenar inflasi dan langkah yang diambil bagi membendung inflasi.
15. PR-1333-L70028
Datuk Abd Rahim bin Bakri [Kudat] minta **MENTERI KEWANGAN** menyatakan berapakah kutipan GST setakat ini. Adakah kutipan ini mampu “offset”• pungutan hasil berkaitan petroleum negara yang nampaknya telah mengalami penyusutan hasil kejatuhan harga minyak di pasaran antarabangsa.
16. PR-1333-L70283
Dato' Fauzi bin Abdul Rahman [Indera Mahkota] minta **MENTERI KEWANGAN** menyatakan apakah langkah Kementerian untuk menyusun strategi kewangan dan struktur cukai yang boleh membantu rakyat, khususnya rakyat berpendapatan rendah dan sederhana di dalam menempuh suasana kenaikan kos hidup yang keterlaluan dan mendadak. Kini rakyat merungut dengan kenaikan kos sara hidup yang berpunca daripada kenaikan harga minyak, kenaikan tarif elektrik, cukai import yang tinggi, kejatuhan nilai ringgit, penurunan pendapatan di atas penurunan harga komoditi eksport dan cukai GST.
17. PR-1333-L69684
Datuk Hajah Norah binti Abd Rahman [Tanjong Manis] minta **PERDANA MENTERI** menyatakan apakah peranan PEMANDU dalam menangani masalah ekonomi negara terutamanya penurunan nilai mata wang ringgit, penurunan harga komoditi (getah dan kelapa sawit) dan penyusutan pasaran saham.
18. PR-1333-L70456
Datuk Mohd Idris bin Jusi [Batu Pahat] minta **MENTERI KESIHATAN** menyatakan rancangan mempercepatkan penempatan graduan perubatan dalam latihan “*housemanship*” bagi mengatasi masalah penantian yang panjang yang menimbulkan rasa kecewa dan merugikan pelaburan tinggi dalam pendidikan perubatan.
19. PR-1333-L70586
Dato' Ahmad Fauzi bin Zahari [Setiawangsa] minta **MENTERI PENDIDIKAN** menyatakan berapakah jumlah sekolah rendah dan menengah yang dikelaskan sebagai Sekolah Kurang Murid (SKM) di seluruh Malaysia dan apakah perancangan Kementerian terhadap sekolah tersebut.

20. PR-1333-L71070
Tuan Teo Kok Seong [Rasah] minta **MENTERI PENDIDIKAN** menyatakan :-
(a) status terkini mengenai permohonan pemindahan SJK(C) Ladang Ulu Kanchong di Negeri Sembilan; dan
(b) mengapakah Kerajaan tidak memberi bantuan yang sepenuhnya untuk memindahkan sekolah-sekolah SJK (C) dan SJK(T) yang bilangan pelajaranya amat kurang ke kawasan mempunyai kepadatan penduduk yang tinggi.
21. PR-1333-L71341
Dato' Sri Hasan bin Malek [Kuala Pilah] minta **MENTERI KESIHATAN** menyatakan apakah langkah-langkah yang telah diambil bagi mempertingkatkan kemudahan serta peralatan dan penempatan Doktor Pakar di Hospital Jempol memandangkan Hospital Tuanku Ampuan Najihah, Kuala Pilah tidak mampu untuk menampung limpahan pesakit terutamanya daripada Daerah Jempol pada masa ini.
22. PR-1333-L71012
Tuan Shamsul Iskandar bin Mohd Akin [Bukit Katil] minta **MENTERI PERTANIAN DAN INDUSTRI ASAS TANI** menyatakan :-
(a) berapakah baki terkini keluasan kawasan tanah yang digazet untuk pertanian di seluruh negeri Melaka; dan
(b) apakah fokus tanaman utama yang disasarkan untuk kawasan pertanian tersebut.
23. PR-1333-L69738
Datuk Linda Tsen Thau Lin [Batu Sapi] minta **PERDANA MENTERI** menyatakan keberkesanan tindakan yang telah diambil untuk menangani masalah rompakan dan penculikan oleh penjenayah dari negara jiran di Pantai Timur negeri Sabah yang termasuk dalam Zon Selamat Sabah.
24. PR-1333-L71439
Tuan Tan Kok Wai [Cheras] minta **MENTERI PERTANIAN DAN INDUSTRI ASAS TANI** menyatakan kesan penyusutan nilai ringgit terhadap makanan yang diimport, jumlah bilangan makanan import tahun lepas dan tahun ini. Nyatakan defisit perdagangan makanan untuk tempoh 5 tahun sebelum ini.
25. PR-1333-L69700
Datuk Dr. Ewon Ebin [Ranau] minta **MENTERI KEWANGAN** menyatakan sama ada Kerajaan bersedia untuk memberikan pertimbangan khas bagi menurunkan kadar GST (*Good & Services Tax*) bagi negeri Sabah bagi mengimbangi kos sara hidup yang tinggi di negeri ini.

26. PR-1333-L71235
Dato' Kamarul Baharin bin Abbas [Telok Kemang] minta **MENTERI KESIHATAN** menyatakan :-
- (a) apakah Kerajaan akan melaksanakan kawalan harga (*price control*) ubat-ubatan seperti mana yang dilakukan dalam kawalan harga barangan keperluan asas yang lain; dan
 - (b) penambahan dana yang terpaksa diperuntukkan oleh Kerajaan dalam menangani kenaikan pembelian ubat-ubatan dan kelengkapan di hospital-hospital Kerajaan akibat daripada penyusutan nilai ringgit.
27. PR-1333-L69638
Tuan Khoo Soo Seang [Tebrau] minta **MENTERI PENDIDIKAN** menyatakan apakah garis panduan yang diberikan untuk memastikan Dewan Bahasa dan Pustaka (DBP) menjalankan pemeriksaan terhadap buku-buku teks yang diterbitkan oleh pencetak buku swasta supaya mengurangkan kesilapan dan kesalahan tatabahasa dalam buku teks.
28. PR-1333-L70833
Tuan Nga Kor Ming [Taiping] minta **MENTERI PENDIDIKAN** menyatakan memandangkan Kerajaan Negeri Sarawak telah mengiktiraf secara rasmi Sijil Peperiksaan *United Examination Certificate (UEC)*, apakah cadangan Kerajaan Persekutuan untuk berbuat demikian dan bilakah ia akan dilakukan.
29. PR-1333-L69943
Dato' Shamsul Anuar bin Haji Nasarah [Lenggong] minta **PERDANA MENTERI** menyatakan langkah mengekalkan perpaduan rakyat dalam negara ini. Apakah Kerajaan bersedia mengubah atau meminda beberapa polisi agar perpaduan rakyat dapat dipelihara.
30. PR-1333-L70183
Dato' Dr. Nik Mazian bin Nik Mohamad [Pasir Puteh] minta **MENTERI PENGANGKUTAN** menyatakan mengenai projek-projek Kerajaan di kawasan Tok Bali, Pasir Puteh Kelantan. Bilakah Kerajaan akan mengangkat taraf kedudukan pelabuhan Tok Bali daripada pelabuhan '*supply-base*' kepada pelabuhan yang menguruskan perusahaan import dan eksport.
31. PR-1333-L71265
Dato' Seri Tiong King Sing [Bintulu] minta **MENTERI KERJA RAYA** menyatakan :-
- (a) apakah perkembangan atau keputusan Kementerian berkenaan permohonan daripada Persatuan Pengangkutan Lori Sarawak berkenaan isu penyelarasan Berat Dengan Muatan (BDM) di antara Semenanjung Malaysia dengan Sabah & Sarawak yang telah dibangkitkan sebelum ini; dan
 - (b) apakah kekangan yang dihadapi oleh pihak Kementerian dalam isu penyelarasan BDM yang masih belum diselesaikan.

32. PR-1333-L70980
Dato' Ar. Wan Mohammad Khair-il Anuar bin Wan Ahmad [Kuala Kangsar] minta **MENTERI PENDIDIKAN** menyatakan apakah pendekatan yang diambil oleh Kerajaan bagi mengukuhkan lagi Bahasa Melayu di peringkat pentadbiran Kerajaan kerana terdapat Ketua-Ketua Jabatan yang tidak boleh bertutur dan menulis dalam Bahasa Melayu, demi menyediakan Bahasa Melayu menjadi bahasa utama negara menjelang tahun 2020.
33. PR-1333-L69797
Dato' Kamarudin bin Jaffar [Tumpat] minta **MENTERI PENGANGKUTAN** menyatakan perkembangan terkini usaha untuk mengenal pasti dan mengambil tindakan terhadap pihak yang menembak jatuh pesawat MH17.
34. PR-1333-L71063
Datuk Ikmal Hisham bin Abdul Aziz [Tanah Merah] minta **MENTERI BELIA DAN SUKAN** menyatakan apakah perancangan yang dilakukan bagi meningkatkan sukan bola sepak di negara ini yang kini berada pada tahap sangat buruk.
35. PR-1333-L70888
Dr. Lee Boon Chye [Gopeng] minta **MENTERI DALAM NEGERI** menyatakan bilangan kes setiap tahun sejak 2010 yang dilaporkan kepada pihak polis atau Jabatan Imigresen yang mana pekerja asing disyaki menjadi mangsa perdagangan orang.
36. PR-1333-L70372
Tan Sri Datuk Seri Panglima Joseph Pairin Kitingan [Keningau] minta **MENTERI PERTAHANAN** menyatakan berapakah batalion angkatan tentera yang sudah ditempatkan di kawasan-kawasan ESSCOM sepanjang Pantai Timur Sabah untuk mengawal keselamatan atau mencegah pencerobohan dari luar dan adakah kemudahan Kerajaan yang ada sekarang seperti perumahan tentera, senjata atau peralatan, kapal perang atau bot laju, helikopter, sistem radar dan lain-lain mencukupi.
37. PR-1333-L71043
Puan Teo Nie Ching [Kulai] minta **MENTERI DALAM NEGERI** menyatakan hasil siasatan semula selepas Mahkamah Rayuan pada September tahun lalu memutuskan bahawa kematian Teoh Beng Hock itu akibat tindakan menyalahi undang-undang oleh seorang atau beberapa orang yang tidak dikenali, termasuk pegawai SPRM.
38. PR-1333-L70596
Tuan Liew Chin Tong [Kluang] minta **PERDANA MENTERI** menyatakan status tender *Loji Waste to Energy* di Taman Beringin, Kepong, dan projek usaha sama IHI Enviro dengan KUB di Johor.

39. PR-1333-L70277
Dato' Mohd Ariff Sabri bin Abdul Aziz [Raub] minta **PERDANA MENTERI** menyatakan :-
- (a) apakah tindakan Perdana Menteri/Menteri Kewangan untuk mengatasi laporan terhadap beliau kepada pihak berkuasa antarabangsa, OAG Switzerland dan FBI Amerika; dan
 - (b) bagaimanakah status keinginan Perdana Menteri/Menteri Kewangan untuk menyaman WSJ berhubung dakwaan yang disiarkan oleh WSJ.
40. PR-1333-L70532
Tuan Sim Tze Tzin [Bayan Baru] minta **MENTERI DALAM NEGERI** menyatakan rasional mengharamkan perhimpunan Kita Lawan dan Bersih4 tetapi membenarkan Himpunan Baju Merah memandangkan semua perhimpunan adalah protes jalanan. Mengapa ada "*double standard*".
41. PR-1333-L69992
Tuan Er Teck Hwa [Bakri] minta **MENTERI PERTAHANAN** menyatakan apakah status Batalion Marin yang dikenali sebagai Marine Corp yang diisytiharkan cadangan penubuhannya pada tahun 2012. Senaraikan peralatan, jumlah tenaga kerja mengikut pecahan pentadbiran dan operasi, anggaran perbelanjaan yang diperlukan untuk tujuan ini.
42. PR-1333-L70423
Tuan Lim Lip Eng [Segambut] minta **PERDANA MENTERI** menyatakan mengapa Hakim Mahkamah Rayuan Datuk Mohd Hishamudin Mohd Yunus, yang telah bersara, tidak mendapat kenaikan pangkat ke Mahkamah Persekutuan walaupun telah dicadangkan oleh Suruhanjaya Pelantikan Kehakiman pada 2013 dan berapa kes cadangan Suruhanjaya untuk kenaikan pangkat tidak diterima.
43. PR-1333-L70610
Datuk Haji Shabudin bin Yahaya [Tasek Gelugor] minta **MENTERI SUMBER ASLI DAN ALAM SEKITAR** menyatakan tindakan yang akan diambil kepada Kerajaan negeri Pulau Pinang yang meluluskan tambakan laut (*reclamation*) di beberapa kawasan persisiran pantai Pulau Pinang yang menimbulkan kesan negatif kepada alam sekitar dan menjejaskan kesejahteraan kehidupan rakyat.
44. PR-1333-L71116
Tuan Jeff Ooi Chuan Aun [Jelutong] minta **PERDANA MENTERI** menyatakan manakah syarikat-syarikat yang akan diberi bantuan dan dokongan Tabung Khas RM20 bilion menerusi suntikan dana ke dalam ValueCap. Adakah ia hanya khusus diperuntukkan kepada syarikat-syarikat Bumiputera.
45. PR-1333-L70886
Dr. Lee Boon Chye [Gopeng] minta **MENTERI DALAM NEGERI** menyatakan bilangan kes yang disiasat dan dicaj di bawah Akta Antipemerdagangan Orang dan Antipenyeludupan Migran setiap tahun sejak 2010.

46. PR-1333-L70464
Tuan Ng Wei Aik [Tanjong] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan cara perhitungan beliau sehingga penganjur perhimpunan Bersih 4.0 perlu membayar kos pembersihan sejumlah RM65,000 manakala penganjur perhimpunan 16 September hanya perlu membayar kos pembersihan sejumlah RM38,000 dan bercanggahan dengan perhitungan Dewan Bandaraya Kuala Lumpur (DBKL) yang menganggap kos pembersihan sejumlah RM50,000.
47. PR-1333-L70943
Dato' Abd. Aziz bin Haji Sheikh Fadzir [Kulim Bandar Baharu] minta **MENTERI DALAM NEGERI** menyatakan adakah komplot yang dikatakan mahu menjatuhkan Kerajaan mempunyai kaitan dengan isu 1MDB dan jika ada, apakah kaitan kedua-dua isu ini dan tindakan Kerajaan dalam mengatasi isu-isu ini.
48. PR-1333-L70365
Tuan Wong Tien Fatt @ Wong Nyuk Foh [Sandakan] minta **MENTERI PENGANGKUTAN** menyatakan apakah status naik taraf Pelabuhan Sepanggar Terminal sebagai Transshipment Hub. Nyatakan perancangan itu secara terperinci.
49. PR-1333-L70892
Tuan Loke Siew Fook [Seremban] minta **MENTERI DALAM NEGERI** menyatakan status siasatan ROS terhadap Parti DAP dan bilakah permohonan cawangan-cawangan baru yang telah diserahkan kepada ROS dapat diluluskan.
50. PR-1333-L70824
Tuan Gobind Singh Deo [Puchong] minta **PERDANA MENTERI** menyatakan apakah sebab-sebab atas mana pertuduhan terhadap Ali tinju di bawah Akta Hasutan digugurkan dan sama ada Kerajaan akan mengesyorkan supaya semua pertuduhan di bawah Akta Hasutan digugurkan juga.
51. PR-1333-L70243
Dato' Haji Zainudin bin Ismail [Jelebu] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan :-
- (a) apakah punca kenaikan harga rumah yang keterlaluan dan langkah-langkah dan tindakan Kementerian bagi membendung kenaikan perkara ini daripada berterusan; dan
 - (b) adakah pihak Kementerian bercadang untuk merangka undang-undang kawalan harga rumah yang lebih ketat bagi menjaga dan melindungi kepentingan rakyat dan mengelakkan harganya dimanipulasi atau dipengaruhi pembelian spekulasi.

52. PR-1333-L70670
Tuan Tony Pua Kiam Wee [Petaling Jaya Utara] minta **MENTERI KEWANGAN** menyatakan sebab pinjaman 1MDB sebanyak US\$975 juta daripada Konsortium Deutsche Bank pada tahun 2014 tidak dilaporkan dalam Penyata Kewangan 2014. Adakah tujuan pinjaman tersebut adalah untuk menebus opsyen yang diberi kepada Aabar Investment.
53. PR-1333-L70702
Tuan Manivanan a/l Gowindasamy [Kapar] minta **PERDANA MENTERI** menyatakan :-
- (a) apakah rasional rumah mampu milik yang dibina oleh Perbadanan PR1MA Malaysia (PR1MA) terbuka untuk pembeli rumah kedua sedangkan ramai pembeli rumah kali pertama masih mencari-cari rumah seumpama itu dan / atau belum memiliki rumah pertama; dan
 - (b) apakah rasional dan faktor-faktor yang menyebabkan Perbadanan PR1MA Malaysia (PR1MA) meningkatkan harga siling rumah mampu milik daripada RM350,000 kepada RM450,000.
54. PR-1333-L71152
Ir. Shaharuddin bin Ismail [Kangar] minta **MENTERI KESIHATAN** menyatakan apakah jumlah seramai 305, 845 orang penderma organ yang telah berikrar untuk menderma organ sejak 1997 hingga Julai 2015 telah membantu pesakit-pesakit yang memerlukan dan apakah sasaran Kementerian bagi menjayakan kempen ini.
55. PR-1333-L71166
Tuan Ahmad Marzuk bin Shaary [Bachok] minta **MENTERI DALAM NEGERI** menyatakan demonstrasi-demonstrasi yang menuntut Perdana Menteri meletak jawatan sejak tahun 1998. Nyatakan jumlah kehadiran peserta, jumlah kerahan polis FRU, polis biasa, polis cawangan khas, kos operasi polis dan lokasi berkumpul setiap demonstrasi berkenaan.
56. PR-1333-L69880
Datuk Dr. Makin @ Marcus Mojigoh [Putatan] minta **MENTERI KEWANGAN** menyatakan :-
- (a) berapa ramai bekas kakitangan Syarikat Penerbangan *Malaysia Airlines Systems* yang menganggur; dan
 - (b) apakah usaha yang telah dibuat oleh pihak Kerajaan untuk membantu mereka untuk mendapatkan kerja semula.

57. PR-1333-L70711
Datuk Seri Noh bin Haji Omar [Tanjong Karang] minta **MENTERI DALAM NEGERI** menyatakan berapa ramai rakyat Malaysia yang berumur 12 tahun ke bawah yang telah meninggal dunia sejak 10 tahun yang lepas mengikut pecahan kaum.
58. PR-1333-L70919
Puan Kasthuriraani a/p Patto [Batu Kawan] minta **MENTERI SUMBER ASLI DAN ALAM SEKITAR** menyatakan jika Kerajaan mempunyai apa-apa rancangan untuk memperkenalkan serta mengenakan "*carbon tax*" ke atas syarikat-syarikat antarabangsa untuk mengurangkan pelepasan gas rumah hijau "*greenhouse gas emissions*". Jika ya, nyatakan bila dan jika tidak, mengapa.

ATURAN URUSAN MESYUARAT DAN USUL-USUL

1. (D.R. 31/2015) Rang Undang-undang Perbekalan 2016 - **Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang” (27 Oktober 2015)**

[Menteri Kewangan]

DAN

Usul dibuat oleh YAB Menteri Kewangan dan masalah dicadangkan :-

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari lima puluh dua bilion ringgit (RM52,000,000,000) dibelanjakan daripada Kumpulan Wang Pembangunan bagi tahun 2016, dan bagi tujuan dan butiran perbelanjaan pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2016, yang dibentangkan sebagai Kertas Perintah 42 Tahun 2015, adalah diuntukkan di bawah Maksud-maksud yang berkenaan jumlah-jumlah yang bersetentangan dengan butiran-butiran itu di ruangan enam dan tujuh senarai tersebut.”

Menyambung semula Perbahasan atas masalah (27 Oktober, 2015)

2. (D.R. 32/2015) Rang Undang-undang Kewangan 2015 **Bacaan Kali Yang Kedua**
[Menteri Kewangan]
3. (D.R. 28/2015) Rang Undang-undang Perbadanan Insurans Deposit Malaysia (Pindaan) 2015 - **Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang” (22 Oktober 2015)**
[Menteri Kewangan]
4. (D.R. 30/2015) Rang Undang-undang Syarikat 2015 **Bacaan Kali Yang Kedua**
[Menteri Perdagangan Dalam Negeri, Koperasi dan Kepenggunaan]

5. (D.R. 29/2015) Rang Undang-undang Skim Kepentingan 2015. “

**[Menteri Perdagangan Dalam Negeri,
Koperasi dan Kepenggunaan]**
6. (D.R. 9/2015) Rang Undang-undang Kanun Tatacara Jenayah (Pindaan) 2015 “

[Menteri Dalam Negeri]
7. (D.R. 12/2015) Rang Undang-undang Keterangan (Pindaan) 2015 “

[Menteri di Jabatan Perdana Menteri]
8. (D.R. 24/2014) Rang Undang-undang Dadah Berbahaya (Pindaan) (No. 2) 2014 “

[Menteri Kesihatan]

9. PR-1333-U69963

Datuk Dr. Makin @ Marcus Mojigoh [Putatan] akan mencadangkan:-

“Bahawa Dewan ini mengambil maklum bahawa sejak akhir-akhir ini, dan Gerakan Sabah-Sarawak keluar Malaysia (SSKM) kian mendapat perhatian dan sokongan dari sebilangan kecil rakyat dari kedua-dua negeri ini. Bahawa Dewan ini mengambil maklum bahawa, terdapat rungutan-rungutan di kalangan rakyat negeri Sabah dan Sarawak dalam beberapa isu yang mereka fikirkan bahawa hak mereka, seperti yang dijanjikan dan terkandung dalam Perjanjian Malaysia 1963 telah dicabuli atau tidak ditunaikan. Dan mengambil maklum juga, antara isu utama yang disuarakan dalam rungutan ini adalah kebanjiran pendatang asing ke negeri Sabah dan di tambah buruk pula dengan pemberian status warga Negara kepada mereka ini. Dan mengambil maklum juga bahawa, setiap kali isu 20 perkara (bagi Negeri Sabah) dan 16 perkara (bagi Negeri Sarawak) dalam Perjanjian Malaysia ini disuarakan, terdapat usaha-usaha pihak tertentu untuk mensenyapkan isu ini dan akhirnya rungutan-rungutan ini menjadi satu gerakan ketidakpuasan hati rakyat. Dan mengambil maklum juga bahawa, gerakan ketidakpuasan hati rakyat ini telah sampai satu tahap di mana mereka secara terbuka mengelarkan diri mereka sebagai aktivis Sabah-Sarawak keluar Malaysia atau ringkasnya SSKM. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Kita maklum bahawa, mengambil tindakan Undang-undang semata-mata untuk menghalang mereka ini bagi menyuarakan rungutan mereka ini tidak akan menyelesaikan isu yang ditimbulkan, malah akan merumitkan keadaan lagi di mana mereka akan semakin mendapat simpati daripada kalangan rakyat yang lainnya sementara Kerajaan pula dianggap sebagai tidak perihatin dan kuku besi.

Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka yang menggelarkan diri mereka sebagai SSKM ini."

[Menteri Dalam Negeri]

10. PR-1333-U69964

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, terdapat rungutan-rungutan dikalangan rakyat bahawa sejak akhir-akhir ini, perpaduan, keharmonian, kesejahteraan dan kerjasama antara rakyat negara ini yang terdiri dari berbilang kaum dan agama telah terhakis. Dan mengambil maklum juga, antara isu utama menyebabkan perkara ini berlaku kerana terdapat golongan tertentu yang memainkan isu bangsa dan agama sewenang-wenangnya serta rakyat merasakan tidak ada tindakan tegas yang diambil bagi menangani masalah ini. Dan mengambil maklum juga bahawa, Perhimpunan Bersih 4 dan Perhimpunan Rakyat Bersatu baru-baru ini telah menanamkan bibit kebencian serta syak wasangka antara kaum di negara ini. Dan mengambil maklum juga bahawa, Rukun Negara sebagai tonggak perpaduan, keharmonian, kesejahteraan dan kerjasama antara rakyat negara ini secara tidak langsung tidak lagi dihormati dan dipatuhi. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka ini. Kerajaan juga hendaklah menguatkuasakan segala peruntukan Undang-undang yang ada bagi menghalang mana-mana demokrasi atau perjumpaan umum yang membangkitkan isu bangsa dan agama, yang boleh menggugat perpaduan, keharmonian, kesejahteraan dan kerjasama antara rakyat negara ini."

[Perdana Menteri]

11. PR-1333-U69965

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, terdapat laporan mengatakan bahawa operasi bot lautan dalam yang beroperasi di negara ini tidak mendatangkan faedah kepada negara ini secara total. Dan mengambil maklum juga, antara isu utama yang disuarakan dalam laporan ini adalah, para pengusaha bot lautan dalam ini menjual minyak diesel bersubsidi kepada bot-bot asing. Dan mengambil maklum bahawa, terdapat juga laporan bahawa tangkapan bot lautan dalam ini dijual kepada nelayan asing yang menawarkan harga yang lebih baik. Dan mengambil maklum juga bahawa, kedua-dua aktiviti yang disebutkan ini telah mendatangkan kerugian yang besar kepada negara ini, sama ada dari segi subsidi diesel mahupun dari segi tangkapan hasil lautan di negara ini dijual ke negara asing.

Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu sistem kawalan yang bersepadu bagi memastikan bahawa semua diesel bersubsidi digunakan dengan niat asal serta tangkapan tersebut hendaklah dipasarkan di negara ini.”

[Menteri Pertanian dan Industri Asas Tani]

12. PR-1333-U69966

Datuk Dr. Makin @ Marcus Mojigoh [Putatan] akan mencadangkan:-

“Bahawa Dewan ini mengambil maklum bahawa, isu 1MDB telah mencemarkan nama baik Kerajaan dan Negara Malaysia pada umumnya. Dan mengambil maklum juga, isu 1MDB telah sedikit sebanyak menghakis kepercayaan pelabur asing kepada Sistem Pelaburan di Negara ini. Dan mengambil maklum juga bahawa, isu 1MDB telah disensasikan melalui media sosial, media elektronik dan media asing dengan sewenang-wenangnya yang menggambarkan bahawa syarikat milik Kerajaan ini hampir muflis dan liabilitinya perlu ditanggung oleh Kerajaan. Dan mengambil maklum juga bahawa, hasil daripada kemuskilan ini, rakyat pada umumnya mempersoalkan cara kerja Kerajaan mentadbir 1MDB sehingga mengalami kerugian yang besar dan terpaksa menanggung liability 1MDB. Maka, bagi menangani masalah ini, Dewan Yang Mulia ini hendaklah mengambil ketetapan bahawa, Kerajaan hendaklah memperjelaskan secara terperinci mengenai model perniagaan 1MDB kepada umum agar satu gambaran yang telus dapat mereka perolehi serta mengembalikan kebolehpercayaan rakyat kepada Kerajaan masa kini.”

[Menteri Kewangan]

13. PR-1333-U70485

Tuan Ng Wei Aik [Tanjong] akan mencadangkan:-

“Bahawa Dewan Rakyat ini mengambil ketetapan untuk mengutuk Perhimpunan Rakyat Bersatu yang diadakan pada 16 September 2015 yang sifatnya berbaur perkauman serta bertujuan mengapi-apikan sentimen perkauman, termasuk menuntut supaya sekolah-sekolah Cina ditutup, menggelar anggota-anggota polis yang bertugas sebagai “barua Cina”, cuba menimbulkan kekecohan di Jalan Petaling serta mempersoalkan keperluan “Little India” diwujudkan dan tindakan-tindakan yang sewajarnya harus diambil terhadap pihak penganjur dan pihak-pihak yang harus bertanggungjawab.”

[Menteri Dalam Negeri]

14. PR-1333-U70272

Tuan M. Kulasegaran [Ipoh Barat] akan mencadangkan:-

“Bahawa Dewan ini mengambil maklum demi kepentingan negara dan masyarakat sejagat pandangan serius terhadap kestabilan ekonomi dan kemajuan negara harus diberi perhatian sepenuhnya. Oleh yang demikian Dewan ini perlu mengambil maklum mengenai perkara ini dan mengarahkan Kerajaan untuk mengatasi masalah ini.”

[Perdana Menteri]

15. PR-1333-U70255

Dr. Tan Seng Giaw [Kepong] akan mencadangkan:-

“Bahawa Menteri Kewangan membincangkan cara-cara yang diambil untuk mempertahankan nilai ringgit.”

[Menteri Kewangan]

16. PR-1333-U70256

Dr. Tan Seng Giaw [Kepong] akan mencadangkan:-

“Bahawa Menteri Sumber Asli dan Alam Sekitar mendebatkan masalah jerebu di rantau ini.”

[Menteri Sumber Asli dan Alam Sekitar]

17. PR-1333-U71552

Tuan Fong Kui Lun [Bukit Bintang] akan mencadangkan:-

“Bahawa Kerajaan mempergiatkan usaha untuk menyatu padukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 58 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi negara secara bersama dan merealisasikan impian Malaysia.”

[Perdana Menteri]

18. PR-1333-U71553

Tuan Fong Kui Lun [Bukit Bintang] akan mencadangkan:-

“Bahawa Kerajaan memulihkan pilihan raya Kerajaan Tempatan seluruh negara supaya urus tadbir Kerajaan menjadi cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat.”

[Menteri Kesejahteraan Bandar, Perumahan dan Kerajaan Tempatan]

19. PR-1333-U69805

Dato' Kamarudin bin Jaffar [Tumpat] akan mencadangkan:-

“Bahawa Dewan ini memutuskan untuk Malaysia menerima masuk, memberi perlindungan dan akhirnya memberikan taraf kewarganegaraan kepada 1000,000 orang rakyat negara Syria daripada jutaan orang yang sekarang menjadi pelarian di Turki dan Eropah.”

[Perdana Menteri]

20. PR-1333-U69806

Dato' Kamarudin bin Jaffar [Tumpat] akan mencadangkan:-

“Bahawa Dewan ini merakamkan perasaan sedih dan kecewa bahawa perjalanan kerja-kerja Jawatankuasa Kira-kira Wang Negara (PAC) telah tergendala oleh beberapa sebab dan dengan ini memutuskan untuk meminta Tuan Yang di Pertua Dewan Rakyat dengan segera melicinkan semula perjalanan Jawatankuasa itu.”

[Perdana Menteri]

21. PR-1333-U69807

Dato' Kamarudin bin Jaffar [Tumpat] akan mencadangkan:-

“Bahawa Dewan ini amat tidak berpuas hati dengan kemajuan pembinaan rumah-rumah untuk mangsa banjir negeri Kelantan. Oleh itu Dewan ini mendesak Kerajaan Pusat berusaha dengan lebih gigih lagi bersama dengan Kerajaan Negeri Kelantan untuk melipatkali ganda usaha pembinaan rumah-rumah tersebut.”

[Perdana Menteri]

22. PR-1333-U70769

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, hubungan antara kaum mutakhir ini makin meruncing dan jika tidak dibendung akan mencapai tahap amat merbahaya dan akibatnya negara akan hancur seperti yang terjadi di negara-negara lain yang sedang bergolak akibat isu perkauman. Bila rakyat Malaysia berbangsa Dayak, Kadazan, Orang Asal, Cina , Melayu, Jawa, Bugis atau apa suku kaum sekalipun mengkritik dan mempersoalkan hal tatakelola Negara dan kepimpinan Perdana Menteri dan Kabinetnya, rakyat tidak mempersoalkan ras Perdana Menteri. Rakyat mempersoal Perdana Menteri atas kapasiti beliau sebagai Ketua Eksekutif Negara.BERSIH 4.0 menganjurkan demo jalanan kerana mendesak Perdana Menteri memberi jawapan kepada banyak persoalan yang tidak terjawab.

Soal 1MDB, Derma RM 2.6 bilion, Pertukaran Pegawai-pegawai SPRM, Penamatan khidmat Tan Sri Gani Patail sebagai Pendakwa Raya, pembebasan Abdul Razak Baginda yang rapat dengan Perdana Menteri dalam kes pembunuhan Altantuya Shaaribuu yang amat memalukan negara dan banyak lagi isu yang amat-amat mendesak yang tidak dijawab oleh Perdana Menteri secara meyakinkan. Untuk itu Kerajaan mesti membezakan mengkritik Perdana Menteri bukan mengkritik bangsa Perdana Menteri tetapi kerana Perdana Menteri adalah Ketua Eksekutif Negara yang sememangnya boleh dikritik yang dibenarkan oleh sistem pemerintahan yang diamalkan di negara ini.”

[Perdana Menteri]

23. PR-1333-U70770

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, bila UMNO dan NGO yang menyokong UMNO menganjurkan demo jalanan bertemakan Himpunan Maruah Melayu pada 16 September 2015 yang kemarahan disasarkan kepada rakyat kaum Cina, yang dikatakan mendominasi Himpunan BERSIH 4.0 pada 29 dan 30 Ogos 2015, penganjur memilih kaum Cina sebagai fokus serangan. Penganjur membawa posters dan banners tertulis kata-kata provokasi dan perkauman yang amat merbahaya seperti “Ini Tanah Melayu, Cina boleh keluar”. “Bawa parang dan keris. Tetak Cina. Umno perlukan anda”. Sedangkan yang keluar dijalanan pada 29 dan 30 Ogos 2015 rakyat dari berbagai kaum termasuk Melayu dan Bumiputra yang lain. Kaum lain selain Cina juga menyuarakan perasaan tidak puas hati mereka terhadap Perdana Menteri. Di mana yang dikatakan Cina menghina Melayu dan Maruah Melayu dicabar. Kerajaan mesti berjiwa besar. Walaupun Kerajaan Barisan Nasional diterajui oleh UMNO dan Melayu tetapi rakyat negara ini terdiri dari berbagai bangsa yang wajib dilindungi dan dihormati.”

[Perdana Menteri]

24. PR-1333-U70772

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, penyakit Denggi akibat jangkitan nyamuk di Malaysia telah mencapai satu tahap yang merbahaya. Lebih parah kematian akibat penyakit ini sudah diterima sebagai satu yang lumrah dan tidak ada rasa bersalah oleh pemerintah. Kerajaan sepatutnya menubuhkan satu institusi khas bagi melawan wabak ini dengan memberikan peruntukan kewangan yang secukupnya serta membekalkan berbagai pakar bagi menjadikan institusi ini betul-betul memberi tumpukan dan perhatian kepada masalah yang begitu lama tidak dapat diselesaikan. Malaysia mesti memainkan peranan utama dan boleh menjadi juara dalam memerangi penyakit ini bukan sahaja di rantau ini malah di dunia. Kerajaan mesti serius dan komited dalam hal ini.”

[Menteri Kesihatan]

25. PR-1333-U70774

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, Kementerian Belia dan Sukan banyak memberi tumpuan kepada pembangunan sukan tetapi meninggalkan pembangunan belia di belakang. Setiap tahun ribuan anak-anak Malaysia yang keluar dari sekolah dan ramai yang tidak melanjutkan pelajaran ke pengajian tinggi atas berbagai sebab dan alasan. Akibat tidak ada program wajib yang mesti diikuti dan disertai oleh mereka, mereka menjadi satu eset yang amat bernilai yang terbiar dan tidak dimanfaatkan sepenuhnya. Adalah dicadangkan anak-anak ini, didaftarkan dan diwajibkan menyertai Khidmat negara selama dua tahun seperti yang dilakukan dikebanyakkan negara. Semasa dalam program ini, pilih dua atau tiga bidang ilmu yang boleh memberi menafaat berterusan bila mereka tamat program nanti. Sebagai contoh, ilmu motor mekanik dan elektrik. Selepas dua tahun mereka boleh berdikari dan bantuan susulan boleh diusahakan. Untuk memastikan program ini berjaya ianya mesti dilaksanakan sebagai program wajib dan dikembangkan dengan elemen ketenteraan.”

[Menteri Belia dan Sukan]

26. PR-1333-U70776

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, kegiatan merempit oleh anak-anak muda khasnya anak Melayu amat memalukan bangsa dan Kerajaan. Kerajaan seolah-oleh tidak ada jawapan pada permasalahan ini. Mereka yang merempit bukan sahaja membahayakan nyawa mereka juga nyawa orang awam. Adalah dicadangkan pihak polis menggunakan anggota Cawangan Khas bagi meninjau dan kenal pasti ketua kumpulan ini dan menahan mereka atas undang-undang yang sedia ada. Penahanan mereka hendaklah dihebahkan dalam akhbar dan media elektronik. Menahan mereka untuk beberapa malam di lokap dan jika ada bukti yang cukup mendakwa mereka di mahkamah akan menghantar mesej yang jelas bahawa kegiatan mereka amat merbahaya dan amat dibenci oleh masyarakat. Ini mesti dilakukan secara konsisten bukan berkala.”

[Menteri Dalam Negeri]

27. PR-1333-U71195

Tuan Hee Loy Sian [Petaling Jaya Selatan] akan mencadangkan:-

“Bahawa Dewan ini mengemukakan Undi Tidak Percaya terhadap Perdana Menteri Datuk Seri Najib Tun Razak atas alasan penerimaan “Wang Derma” berjumlah RM2.6 billion yang pada mulanya dinafikan, kemudiannya mengugut untuk menyaman akhbar Wall Street Journal dan akhirnya mengakui wang tersebut diperolehi daripada individu yang berasal dari Timur Tengah.

Dengan tidak menjelaskan mengapa “Wang Derma” ini dimasukkan ke akaun peribadi dan bukan atas nama parti, Dewan juga tidak berpuas hati ke atas siasatan skandal 1MDB yang berlaku di mana “Special Task Force” yang sepatutnya menyiasat skandal ini dibubarkan tanpa memberi sebarang alasan sehingga Peguam Negara Tan Sri Abdul Gani Patail ditamatkan perkhidmatan, pegawai SPRM dipindahkan, pihak polis mengganggu siasatan SPRM dan Bank Negara, Public Account Committee (PAC) yang sedang menjalankan siasatan terhadap kes 1MDB tidak berfungsi akibat daripada empat anggota PAC yang terbabit telah dilantik menjadi Menteri atau Timbalan Menteri oleh Perdana Menteri, Pengarah Cawangan Khas (SB) diberhentikan, Timbalan Pengarah Cawangan Khas dipindahkan ke Jabatan Perdana Menteri tanpa diberi tugasan. Disebabkan masalah yang dinyatakan, Perdana Menteri Datuk Seri Najib Tun Razak telah menjejaskan imej Negara di dunia dan menyebabkan pelabur tidak yakin terhadap Kerajaan sekarang sehingga ekonomi menjadi tidak stabil, serta pasaran saham menjunam teruk dan kejatuhan nilai wang ringgit Malaysia berbanding dengan dolar Amerika Syarikat. Maka rakyat Malaysia tidak lagi percaya terhadap Perdana Menteri dan dengan ini Dewan hendaklah mengambil ketetapan untuk mengemukakan Undi Tidak Percaya terhadap Perdana Menteri.”

[Perdana Menteri]

28. PR-1333-U70806

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gegaja pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu dketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama.”

[Menteri Kesejahteraan Bandar, Perumahan dan Kerajaan Tempatan]

29. PR-1333-U70808

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan.”

[Menteri Dalam Negeri]

30. PR-1333-U70809

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia.”

[Menteri Pendidikan]